



KEMENTERIAN PERTANIAN DAN INDUSTRI MAKANAN

Ministry of Agriculture and Food Industries

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : www.mafi.gov.my

SIARAN MEDIA

MAFI SIAP SIAGA PANTAU SITUASI SEKTOR AGROMAKANAN NEGARA

PUTRAJAYA, 17 NOVEMBER 2022 – Pasukan MAFI Prihatin diketuai Ketua Setiausaha Kementerian Pertanian dan Industri Makanan (MAFI), Dato' Haslina Abdul Hamid, hari ini turun padang bagi meninjau sendiri beberapa kawasan pertanian yang terjejas banjir di daerah Klang.

Menerusi program tersebut, MAFI telah melawat beberapa tapak projek di bawah seliaan Jabatan Pertanian (DOA) Negeri Selangor dan Jabatan Perkhidmatan Veterinar (DVS) yang terjejas banjir iaitu Projek Tanaman Rock Melon yang diusahakan oleh En. Mohd Kamal Radima, Projek Tanaman Sayur Timun yang diusahakan oleh En. Muhammad Hasbi Assiddiqi Mohd Nasi dan Projek Ternakan Lembu yang diusahakan oleh En. Muhd Fahrozi Alias.

Selain diberi taklimat berkaitan projek-projek yang terjejas dan anggaran nilai kerosakan, Pasukan MAFI Prihatin turut menyampaikan sumbangan kepada komuniti agromakanan yang terkesan. Turut hadir dalam sesi lawatan ini, Ketua Pengarah DOA, Dato' Zahimi Hassan, Ketua Pengarah DVS, Dr Akma Ngah Hamid serta Pegawai Kanan Kementerian.

Menurut Dato' Haslina, MAFI sentiasa bersiap siaga dan cakna dengan setiap laporan hasil daripada pemantauan yang dijalankan. Bilik Gerakan MAFI seluruh negara juga telah digerakkan serta merta bagi membantu mangsa banjir terutamanya golongan petani, penternak dan nelayan yang terjejas. Kementerian telah menyediakan sebanyak 10 ribu Kit Bantuan berupa produk agromakanan sebagai persiapan awal untuk menyantuni komuniti dan warga tani di seluruh negara.

Selain itu Jabatan dan Agensi melalui MAFI Inc turut memantau situasi dan membantu golongan sasaran MAFI yang terjejas berikutan keadaan cuaca yang sukar dijangka pada masa kini. MAFI Inc. juga diminta mengadakan libat urus bersama Jawatankuasa Pengurusan Bencana Daerah (JPBD) dan Jawatankuasa Pengurusan Bencana Negeri (JPBN) bagi memastikan maklumat berhubung penyelarasan bencana banjir di peringkat daerah dan negeri sentiasa dikemaskini dan disampaikan kepada kumpulan sasaran MAFI terutamanya di kawasan-kawasan yang berisiko mengalami bencana. Antaranya membuat hebahan awal kepada golongan sasaran dan melaksanakan plan mitigasi bagi mengurangkan kesan kerugian kepada sektor pertanian dan agromakanan.

Dalam usaha membantu golongan petani, penternak dan nelayan, MAFI turut menyediakan bantuan-bantuan pasca bencana kepada kumpulan sasaran sektor pertanian dan agromakanan yang terkesan melalui Tabung Bencana Tanaman Padi (TBTP) bagi tanaman padi dan Program Pembangunan Semula Projek Agromakanan (PPSPA) bagi aktiviti agromakanan selain tanaman padi.

Untuk rekod sehingga Oktober tahun ini, sejumlah RM13.5 juta peruntukan telah disalurkan kepada seramai 2,167 petani yang terjejas akibat bencana bagi sektor tanaman padi melalui TBTP, dan sejumlah RM39.6 juta peruntukan kepada 4,833 kumpulan sasaran yang terkesan melalui PPSPA.

Kementerian akan sentiasa memastikan kebajikan dan keselamatan terutamanya golongan sasaran MAFI diberi perhatian sepenuhnya dengan kerjasama erat daripada semua Jabatan dan Agensi Negeri, selain bersiap-siaga bagi menggerakkan aset-aset untuk membantu usaha-usaha menyelamatkan semasa banjir sekiranya perlu dengan kerjasama dan kebenaran daripada pihak NADMA.

KEMENTERIAN PERTANIAN DAN INDUSTRI MAKANAN
17 NOVEMBER 2022